

Wulf Wagers wunderliche Weltbetrachtung

Dommm derfsch sei, aber net bleed!

Dass Bildung ond Intelligenz zwoi paar Stiefel send, isch schon lang klar. Dommm isch bloß, dass onserer Jugend – ond domit moin i die zwischa 16 ond 40 – oft boides fehlt ond d' Dommmheit leider a ganze Generation befalla hot. Dui neieschte PISA-Studie hot wieder bewiesa, das mir Bada-Württaberger bleeder send wia die Sachsa. Hallo!? Was soll denn des?

Meischt sends ganz banale Sacha, die die Unbildung offalegt: Selma Lagerlöf isch für die meischte a Regal bei IKEA ond koi schwedische Dichterin. Es geit Situationa wo mr besser wüsst, dass UNO net bloß a Kartenspiel, dass Polkappa net bloß an dr Autobatterie zom fenda send ond dass



mr aus ma Ganza koine zwoi Drittel oder 110 Prozent macha ka.

Gar net guad kommt 's a, wenn mr uf dia Frog, wer da deutsche Bundeskanzler wählt, mit „Ich“ antwortet.

Ond weil soviele so bleed send, han i au a ganz bleede Idee: I verstand zom Beispiel net, wie onser Bundesregierung dene Pleitebanka Geld geba ka, wo se

doch selber soviel Schulda hend ond sich's Geld bei de Bank leiha miassat. Scheinbar hend dia Politiker gemeinsam mit de Banker a wunderbars perpetuum mobile erfonda. Deshalb gründ i jetzt ganz oifach ohne Eigakapital, bloß mit glihenem Geld a Bank, setzt se durch gierige Spekulationa ond Geschäfta mit andere Pleitebanka en Sand, ond lass me no aus em Staatssäckel wieder saniera. Vorher versetz i mi mit ra Millionaabfindung in da Ruhestand. Des isch doch a geniale Geschäftsidee – ond bleed isch des net, oder?

Bis näggschd Woch'

Ihr
Wulf Wager